

欽定大清會典事例

欽定大清會典事例卷六百九十六

兵部

郵政 驛禁一

驛禁。○順治七年題准。直省齎奏人等。皆用部頒火牌。司驛官驗明方准應付。如有自發牌票索取夫馬者。不准應付。違者部科察叅。與受同罪。○十二年覆准。齎奏文冊背包。以四十斤為率。如有夾帶私物者。該地方官驗實申報究處。○又覆准。督撫濫用私牌。及徇庇屬員不叅者。本部與科道訪實糾叅議處。州縣驛官將私牌

申報者。本官即與紀錄。○十五年題准。公務差往江蘇。安徽。江西。福建。浙江。廣東者。由山東路。湖北。湖南。廣西。雲南。貴州者。由河南路。陝西。甘肅。四川者。由山西路。均於勘合火牌內明白填註。不許枉道。○康熙六年題准。差往江甯。安慶。江西。廣東者。由山東中路。淮安。揚州。京口。蘇州。松江。福建。浙江者。由山東東路。均於勘合火牌內明白填註。不許枉道。○十一年題准。奉

旨差遣及緊急軍務經由地方。司驛官閉門不容進城。抗不應付。或毆打差官者。皆革職提問。若齎

送

御用之物。司驛官應付稽遲者。降二級調用。○又題准。司驛官抗不應付。以致遲誤奏章者。降一級調用。○又題准。凡有以枉道擾驛指叅者。係官降一級調用。係差役杖八十。○又題准。官員科斂民馬充入驛遞使用者。降一級調用。○又覆准。督撫提鎮有本章並公務例應馳驛者。准用部頒勘合火牌。司驛官驗明方准應付。有私用驛遞夫馬。並差遣家人兵役私發牌票索取夫馬者。皆降二級調用。司道副將以下各官私發

牌票索取夫馬者。降二級調用。該管之督撫提鎮失察者。降一級留任。如督撫提鎮及司道副將以下各官之家人兵役。並無牌票。倚勢索取夫馬。本官查出拏究者。免議。至私發牌票。司驛官不加盤詰。即行應付者。革職。將私發牌票據實詳報者。令其離任。以應升之官。即用若司驛官已將私發牌票詳報。督撫提鎮及該管上司容隱不揭。叅者。皆降二級調用。駐防將軍都統以下各官。私用驛遞夫馬及私發牌票者。照此例議處。○又題准。齎進本章用小匣裝盛。不得

過十斤。若送冊籍用馬馱載。不得過六十斤。違者。司驛官據實申報。照例議處。○十四年議准。司驛官藉口錢糧應付不敷。私令民間幫貼者。降三級調用。○十六年題准。司驛官應付稽遲。同城上司並不稽察者。罰俸六月。○又議准。馳驛官員。將同行之領催差官。並從役人等。不行約束。以致毆傷驛遞員役。或不係緊差。故將驛馬馳斃。或故意越站索取財物者。令州縣驛遞官員一面申報上司。一面申報本部。覈查情實。將本官革職。其領催差官等。交刑部從重治罪。

其申報之官。照出首私牌例議敘。若應付遲延。反行捏款。誑報者。反坐。○又議准。奉差官役不遵勘合火牌填註。枉道擾驛者。係官降二級調用。無職人杖一百。首先濫應官降一級調用。○又議准。凡有以枉道擾驛指叅者。係官降二級調用。係差役杖一百。○二十七年題准。出差馳驛官役。如騷擾驛站。管站官員徇情不行報部。事發將管站官員照徇庇例降二級調用。○二十八年覆准。驛傳道私發牌票。違例支取夫馬者革職。○又題准。官兵額外多索船夫及強勒。

越站行走者。照馳驛越站多索例處分。○四十五年。覆准給發勘合火牌。將應經由之州縣驛站。並中道東道西道填註明白。如奉差官役不遵勘合填註。繞道行走。除該官役照例處分外。將首先濫應官一併議處。○五十一年。覆准督撫司道家人私騎驛馬。及因事騷擾需索者。司驛官即報部參奏。若徇庇不報。或由部察出。或被入首告。督撫司道並濫應司驛官。一併議處。

○雍正元年

諭驛站關繫重大。經朕屢加嚴諭。然其間積弊難以盡

詰。有在官之累。有在民之累。如直隸山西差徭更為
浩繁。雖驛馬足數。亦供應不敷。乃內而兵部。外而驛
道。於給發馬匹時。官吏通情受賄。往往所給浮於勘
合之數。且行李輜重。皆令驛卒乘馬背負。多至八九
人不等。所到州縣。以見馬換馬。向有舊例。不敢詰問。
至督撫提鎮經過之處。更惟命是從。嗣後照勘合之
外。有敢多給一夫一馬者。許前途州縣即據實揭報
都察院。以聽糾參。如甲縣容情不揭。而乙縣揭報者。
並甲縣一併治罪。其督撫提鎮騷擾驛遞者。皆照此
例。庶少蘇在官之累。至若河南山東諸省。離京稍遠。

謂耳目易欺。每驛額設馬匹。不過十存三四。其草料工食。仍照舊開銷。且逐年詳報倒斃侵食買補之弊。差使一至。則照里科斂。將民間耕種牲畜。強令當差。令其自備物料。跟隨守候。種種累民。尤屬不法。著該地方督撫。將所有驛站。逐一徹底清查。缺額者勒令補買。至科斂民間牲畜。尤當勒石永禁。違者即從重治罪。○又奉

旨。近來各省將軍督撫。提鎮奏無緊要事。及平常請安摺。馳驛馬者甚多。無故騷擾驛站。以後不可。著傳諭各省知道。○又覆准。將軍督撫提鎮以下各官。如有

家人衙役擅騎驛馬需索驛遞財物。令司驛官申報上司。該上司即行指叅。如容隱不叅。將該上司照徇庇例議處。○又議准督撫提鎮及駐防將軍都統等。有緊要奏摺。准差人馳驛。用馬不得過二匹。若以尋常奏摺。擅差人馳驛者。查叅照例議處。○二年覆准。奉差官役騷擾驛站者。許司驛官申報。如司驛官應付遲誤。亦許奉差員役申報。若已經申報而督撫不叅。及失於覺察者。照例議處。○四年議准。如遇上司擅騎驛馬。令司驛各官收取牌票黏入詳文內。立行

揭叅。將揭報之員。交部從優議敘。擅騎驛馬員。役嚴加議處。○五年覆准。直隸驛站陋規。永行禁革。於額設工料銀內。均勻裁減十分之一。自本年為始。如有不肖官役。別立名色。扣剋索取者。照侵欺錢糧例治罪。○十三年議准。奉差官役所帶之包。不許過六十斤。首站應付包馬時。稱準斤數無浮。於應付簿上註明鈐印。每夜住宿之司驛官。再加查驗。亦於簿上註明某驛驗過。並無重包字樣。若有過六十斤者。稱出斤數詳報。重至七十斤者。官降一級調用。役杖六十。

再有重者。每十斤加一等。重至百斤以上者。官革職。役杖一百。僮司驛官明知重包。故為徇隱不報。經下站查出。將徇隱官一併議處。○又覆准督撫提鎮差官齎送本章。除緊要事務連站馳遞外。其尋常事務。各照該處題定到京限期日行站數。於火牌內註明。經過司驛官查明應付。如有越站急馳至傷驛馬者。官降一級調用。役杖六十。因而傷死驛馬者。官降二級調用。役杖七十。仍追馬還官。若倚奉差索取驛遞財物者。交刑部治罪。至駐防將軍都統副都統等差。

官兵齎送本章。如有越站急馳至傷驛馬者。照此例行。○乾隆六年奏准。奉差官役執有勘合火牌。藉稱緊急。不與司驛官驗看。騷擾驛遞。多索夫馬車船者。司驛官毋得鈐蓋印信。一面將騷擾多索情由。揭報兵部並都察院。據揭參奏。將騷擾驛遞者。係官革職。係役杖一百。多索馬一匹。車一輛。船一隻者。官降三級調用。役杖八十。馬二匹。車二輛。船二隻者。官降四級調用。役杖九十。馬三匹。車三輛。船三隻者。官革職。役杖一百。至每馬一匹。不用者止。准折夫三名。若多

索夫一名者。官降一級調用。役杖六十。二名者。官降二級調用。役杖七十。三名以上者。官降三級調用。役杖八十。六名以上者。官降四級調用。役杖九十。九名以上者。官革職。役杖一百。如奉差官役多索夫馬車輛。司驛官容隱不揭。經下站揭報。將容隱官照徇情例議處。若並無勘合火牌。詐索夫馬車船。司驛官一面詳報該管督撫題叅。一面報部。有職者革職。無職者審明治罪。駐防各官有騷擾多索者。照此例議處。○又奏准。奉差官役並無騷擾多索。司驛官藉端遲

延。不即鈐蓋印信者。許官役據實申報。將司驛官照稽遲應付例議處。○又奏准督撫提鎮將不應撥兵護送之事。私發牌票。擅行撥兵。及私騎營馬者。降二級調用。至司道副將以下各官。私發牌票。擅行撥兵。及私騎驛馬者。降二級調用。失察之該管督撫提鎮。降一級留任。○又奏准。在外文武大小各官。將自畜馬匹勒令驛站收買。多取價值者。革職提問。失察之上司罰俸一年。若有此等情弊。經司驛官據實詳揭。督撫不題參者。照徇庇例議處。詳揭之司驛官。以應

升之官即用。○又奏准司驛官抗不應付。以致遲誤緊急最要專奏本章者。降二級調用。○八年

諭據盛京兵部侍郎春山奏稱盛京等處驛站。每年大驛各出銀十六兩。小驛各出銀八兩。餽送侍郎盤費。又出銀四百兩。餽送正副監督。此外逢節又有規禮。其二十九驛驛丞。一年所得俸銀三十餘兩。又皆餽送侍郎。各計有一千餘兩。凡此皆係驛丞自送。因而驛丞有所恃以無恐。將錢糧任意花費。雖馬匹疲瘦短少。侍郎與監督俱置不問等語。餽送陋規原干例

禁盛京陋習相沿。料非一任。若事窮究。未免挖累多人。今姑寬其已往。嗣後著永行革除。如有再蹈前轍者。必從重治罪。至於各省驛站。或有此等情弊。亦未可定。向來設有巡察御史稽查。今巡察既裁。督撫更當留心查察。使積習漸除。驛務不致廢弛。若日久弊生。或經科道糾參。或欽差大臣經過查出。朕惟爾督撫是問。該部即遵諭行。○又

諭驛遞關繫郵傳。最為緊要。濫騎濫應。例禁甚嚴。而外省擾害之弊。究不能免。朕聞雲貴督撫齎摺入京。路經湖南地方。所用驛馬。在勘合火牌額數以內者。固

當應付。乃陋習相沿。有在額數以外者。地方官亦不得不應。更有並無勘合火牌而私索強騎者。亦不能不應。及被該省上司查出。又以州縣濫應驛馬。照例叅處。甚為苦累。著雲貴督撫嚴飭差弁家人。懍遵功令。不得於勘牌之外。多索一騎。如仍前不改。經朕訪聞。惟該督撫是問。各省有類此者。亦當一體懍遵。○十七年奏准。各省經管驛務之員。如遇執有勘合火票者。照例應付。其上司經過。私事差遣。借用乘騎。不准應付。如違例需索者。即揭報督撫指名題叅。若督撫不行糾叅。一經叅奏。將督撫

一併交部嚴加議處。○十八年奏准嗣後督撫提鎮奏摺必實係緊急軍務不可片刻遲待之事及奉有

諭旨令以六百里由驛馳奏者准填用火牌晝夜限行六百里不得將尋常雨水米價等摺累牘附入至

諭旨限行六百里發往之事該督撫提鎮接到後酌量現辦情形分別緩急亦不必概用六百里覆奏其餘一應奏摺或遣標弁或遣家人自雇腳力齎進儻以尋常之事及並未奉有

諭旨。擅由驛馳奏。甚至限行六百里者。由部察叅。從

重議處。二十年

諭。設驛原以備公。非奉差人員應馳驛者。不得多索濫付。定例綦嚴。近來有驛州縣。遇公私差遣。輒擅自動用夫馬。在屬員以差務為名。在上司亦以供應為便。甚至額設不敷。即不免有取辦民間之事。擾驛遞而累閭閻。不可不力為整飭。著交各省督撫等悉心查禁。儻有任意擅動濫應等弊。即按例嚴叅。不得稍有瞻徇。至督撫等為封疆表率。尤宜恪遵定制。若以郵騎供廝隸奔馳之用。則其違例誤公。罪尤難逭。嗣後

各省驛站。如有復蹈前弊。及督撫等容隱不奏者。一經發覺。必盡法重懲。以清郵政。○又

諭朕令陝甘山西各督撫提鎮等。將買補缺額營馬。每月奏聞一次。止欲伊等上緊購辦。隨時奏聞。但此等奏報。非緊要軍務。刻不可緩者。比原可照例齎奏。不必濫動驛馬。著該部行文各督撫提鎮。嗣後此等奏報。仍令自行遣人齎奏。不得擅由臺站馳遞。○又覆准。嗣後除事關軍需緊要文報。仍由軍臺按限加緊遞送外。其稍涉軍需無關緊急公文。及尋常摺奏。概令由驛接遞。不得遽限四五百里。

由軍臺馳送。儻有仍前混行僉發。或經兵部察出。或被該管上司查叅。即行交部嚴加議處。二十三年覆准。司道府衙門隨丁。並鄰府上司同僚丁役。私用驛馬。因規避處分。巧立借用里馬。餘馬捐馬等項名目。皆因各上司官員。或以驛馬便於使用。司驛等官。因而逢迎濫應。應交各督撫嚴飭查禁。將取用之各員。並濫應之驛官。據實糾叅。如別經發覺者。並將督撫議處。又

諭各省驛站。原為馳遞緊要公文而設。並不許地方官

擅行輕動。乃近來外省陋習。往往於無關緊要事件。遽行插羽飛遞。甚至往來簡帖。亦用郵傳。相沿既久。遂至視為故事。以致馬匹疲乏。於公務轉不免貽誤。甚非慎重郵政之道。嗣後務須嚴行查禁。無論私事。不得擅動驛馬。即地方公事。亦當斟酌緩急。毋得仍蹈前轍。其經過縣驛。各將逐日所遞公文。每月造冊申報該上司查覈。如有違例擅動者。即行嚴參究治。

○又

諭從前曾屢降旨。各督撫非緊急要務。不得輒用急遞。今鐘音奏健銳營兵過境。乃用六百里報發。試思現

在軍報絡繹。正當愛惜馬力。即軍營中有應奏事件。而稍覺可緩者。亦尚附便馳奏。兵丁過境。並非奏報軍情可比。如果辦理已經妥竣。即不奏亦可。何必急遽若此。獨不權事之輕重緩急耶。鐘音著傳旨申飭。以後如有似此率意馳奏者。定交部議處。○二十五年奏准。嗣後州縣官惟承辦大差及委運官物。許其豫備車船。仍不得剋扣腳價。濫差需索。此外私事。但照市價雇覓。概不許濫出差票。擅行封拏。違者從重叅處。○二十七年

諭。新疆地方所有應進貢物。經由各該省州縣境內行

走住宿。有司固應加意照料。小心護送。如果應付草率。以致貢物損壞稽遲。固非地方官辦公之道。如已按照分例給付。不致有誤公事。而齎送貢物之員。有意騷擾地方。則斷不可。蓋此等微末員弁。罔識事體。或不過以鵬鷹犬馬之類。遇事矜張。於例應給付夫馬廩給之外。藉勢多方需索。在地方官以貢物之故。不敢與較。而新疆應貢物產。歲所常有。設將來驛使踵轍遞進。為日正長。滋累何所底止。此風斷不可長。儻有此等滋擾之人。該督撫等有所見聞。不行據實叅奏。經朕察出。決不稍為寬宥。可將此通行沿途各

督撫知之。○三十一年覆准鈔牌名色久經禁止。至今猶未盡革。不可不嚴行申禁。嗣後州縣應付差員夫馬等項。止據傳牌敘入奏銷。毋庸於差員勘牌鈔取。儻有僕隸人等。仍藉鈔牌名色需索規禮者。該督撫查拏究治。並將失察之州縣照例叅處。○又

諭各省遇有應行迅奏事宜。原許其填用火牌。由驛馳遞。至尋常奏摺。自有弁役家人可以齎送。兼程專達。並未嘗稍有稽延。且向來督撫中間有非緊要章奏。擅動驛馬者。尚且傳旨申飭。顏希深乃請將各省奏

摺。概用驛遞。各省應摺奏之文武大員甚多。將何以分孰應由驛。孰不應由驛。若皆准行。則紛紛傳送。必致到處繹騷。償遇衝繁之區。各省奏函並集。往來應付。勢且日不暇給。不但於郵傳有礙。國家亦無此政體。設因省惜程費起見。則督撫藩臬每年廉俸不薄。即遣人齎送。途間資斧需用無多。而必欲悵此區區。過為計較。尤屬見小。所奏不可行。○三十二年

諭。向來各省督撫等。於地方尋常公事。俱不准輕用驛馬。至於本身私事。而由驛遞奏。於例更為不合。恐外省提鎮中似此不曉事體者。尚復不少。著通行傳諭。

嗣後非遇緊要公務。概不准由驛馳奏。儻有不諳輕重。復蹈此轍者。定行照例議處。○又

諭督撫等因公出署。及調赴新任。途間一切日用所需。理宜自行備辦。毋許地方官稍為供應。以啟逢迎而滋派累。前次屢經降旨。通行飭禁。因何復沿積習。此皆該上司等並不實力奉行所致。嗣後儻有再蹈前轍。不知悛改者。一經發覺。朕必從重懲治。決不稍為姑息。將此通諭各督撫等知之。○三十四年覆准。嗣後

欽差大臣鄰省督撫經過地方。如遇有司官仍蹈陋

習遠出迎送。擅動驛馬探報。及本省督撫司道等官。仍專差迎送有累驛馬者。一有見聞。立即自行查叅。儻有容隱不舉。別經發覺。即照上司容隱不舉例。降一級調用。其地方各官所有私用濫應失察。應行降調革職之處。均照定例議處。○三十六年

諭土爾扈特台吉。係新來投誠人衆。前來入覲。所有經過地方官員。理宜豫備整齊。使知天朝體制。業經朕特降諭旨。令各省督撫妥協辦理。乃各省官員尚敢不以為事。以致諸多貽誤。向來出差人等。如果騷擾。

驛站經過地方官詳報該督撫據實奏聞。朕必將騷擾驛站之人治罪。仍將該地方官深為嘉予。今地方官全不以事為事。亦太不堪。若不嚴加治罪。何以力挽積習。將此通諭中外知之。○四十年奉

旨。揭報部科。止准其專人齎投。何得擅動驛馬。首站違例濫應。代為馳遞。其咎實無可貸。至沿途各驛站。接准上站六百里公文。原不能知其中係何緊要事件。自不便擅意駁回。若亦治以濫應處分。於事理未為平允。均毋庸查議。凡有似此者。俱照此辦理。○四十

一年

諭向來外省遇有欽差大臣官員因公過往地方官為之豫備公館亦勢所不免至於公館之外不應復有繁費即如此次將軍等凱旋過境較別項差使自屬緊要一切或稍加周到然凱旋非事所常有其餘則不當援以為例且聞各驛站每有長隨胥役等代辦向其本官任意開銷甚至藉端科派需索累及閭閻流弊滋甚看來外省應酬風氣未能革除於吏治甚有關係地方官豈肯費其養廉不過仍出之民間不可不力為飭禁著各省督撫實力稽查嗣後驛站官員應付差使如有違例逢迎稍涉糜費及長隨胥役

藉差派累者。即行嚴叅重究。督撫等或意存袒徇。經科道叅奏。或朕別有訪聞。惟該督撫等是問。○四十

三年

諭。前以各省驛站。遇出差大臣官員。沿途俱為備辦供應。屢經飭諭嚴禁。該管驛站大員。理應嚴飭所屬遵旨安辦。設有需索情事。或直揭部科。或稟報上司叅劾。其風自必斂戢。何以尚敢沿途勒索。此皆不肖州縣迎合應付。有以誘之。聞此等積弊。始於換馬使費。皆由各驛站馬不足數。或疲瘦不堪。恐為欽差叅奏。遂私自打點彌縫。日久竟成錮習。並聞有上下站合

棚餽養之說。遇到站馬不敷用。即令上站之馬。仍復應差。俗稱為打過站。此於郵政大有關係。蓋由有驛各州縣。平時短餽馬匹。扣剋馬乾草料自肥。及差至需馬稍多。不敷支應。因而巧為生法。以混目前。且計其終年所扣之數甚多。而欽差家人勒索。雖費至十餘金數十金亦尚有限。遂自甘心付給。希冀無事。此等惡習。不可不徹底嚴查。現已另降旨令各省守巡道分管所屬驛傳事務。並令按察使總司其事。嗣後伊等必隨時查點。如有短少及疲瘦者。立即查叅。州縣自必懍法知畏。如果馬匹臃壯。不缺額數。而欽差

來往家人。仍復藉端需索者。即報知管驛之司道。驗明馬匹。具揭該督撫參奏。必將縱容勒索之欽差。並其家人查明從重治罪。如仍有應付驛站之事。一經發覺。除將州縣重處外。惟於該管驛站之司道是問。恐伊等不能當其重戾也。○又

諭。本章關繫緊要。沿途驛站。自應加意護送。設有參官本章。而所劾之員。聞知信息。密遣人中途竊去。以冀耽延消弭。尚復成何事體。今歲河南省已有本箱被竊之事。半年之內。犯案疊出。可見外省吏治廢弛。於遞送本章要事。視同泛常。不可不實力整飭。著傳諭

各省督撫嚴飭所屬。於驛站事宜。務須實心妥辦。毋致疏虞。如再玩忽從事。一經發覺。除將該員斥革究治外。並將該督撫及該管上司從重議處。○四十五年

諭。川省土司入境。由伊土境起身。前至省城。一切俱係己力。地方官本無應付之事。若由成都至京。沿途又有額設驛站。其支給分例。俱准開銷官項。況又分起行走。並不至用逾定額。該地方官有何賠累。若伊等支應供給。有心糜費。並任聽家人胥役浮冒開銷。亦其自取。督撫等何難據實查辦。而轉以賠累為辭乎。

因思土爾扈特及回城伯克來京亦未必無此等浮
議亦當一概令其不來朝謁乎。蓋此皆由各驛站馬
匹本不敷定額。並多疲瘦不堪應用者。一遇差務稍
多。即行支絀。轉藉口於供應賠累。以飾其剋減驛站
馬乾之咎。實為外省惡習。朕屢降諭旨。嚴加飭禁。但
恐地方官視為具文。不知悛改。著再明切申諭各督
撫。嚴飭管驛大小各員。務期馬匹足額。臚壯。如有短
少疲瘦。立即嚴叅示儆。若二三年後。朕特派大臣往
查。仍有此等情弊。惟該督撫是問。且必重治管驛官
之罪。不能稍為寬貸也。○又

諭各省動支正帑。安設驛站。部頒勘合。以備差務往來。郵傳馳遞。關係最為要緊。近年既有巡道分轄。復令臬司總理稽查。更覺嚴密。各督撫等遇有緊要奏函。及題本事件。原准馳驛。定例亦屬周備。其各省陳奏尋常事件。自應專人齎進。不得私借驛騎。滋擾郵站。嗣後各督撫如有齎摺差弁私借驛馬者。一經查出。定將各督撫及借給馬匹之該管驛站官員。均照例嚴行治罪。○五十三年

諭新疆押解人犯及照料回子護送哈薩克使人並押送官物之官員人等。俱係由驛站行走。理宜簡便。若

沿途買帶子女。則揀擇看視。說合講價。既不免守候需時。而買定後。沿途攜帶。又需多用車輛夫馬。必致擾累驛站。貽誤差使。且此等買帶子女之人。未必盡係自行買用。或為人代買。或復行販賣。更易滋生別項情弊。而帶領來使之人。尤為外藩所笑。不可不嚴行查禁。嗣後著該省督撫等。遇有災祲地方。貧民賣鬻子女。除非馳驛官員各聽其便。毋庸禁止外。其有派委差使由驛行走之人。俱應禁止民人不得私行售賣。並隨時查察此等官員。如有違禁私買攜帶者。即行嚴參治罪。○又

諭嗣後督撫提鎮及學政等。凡遇巡查出考。途次所需夫馬等項。均著自行備用。毋得令經過各員代辦。並令文武互相糾察。如有仍前需索擾累者。即行據實叅奏。從重治罪。如或徇隱不奏。別經發覺。朕必將徇隱之員。一併治罪。決不寬貸。○五十五年

諭向來各省督撫等陳奏各摺。如遇有緊要事件。急於上達。或地方公務關繫重大。即需請旨辦理。或有特旨令其由驛馳遞。近日該督撫等奏事。往往擅用五六百里馳遞。及披閱奏函。不過尋常照例之件。事非緊要。止益驚疑。甚屬不曉事體。至由三四百里及馬

上飛遞者。該督撫等尤視為泛常。率行馳奏。殊非慎重驛站之道。嗣後各省督撫等。如非緊要事務。俱不准濫用驛遞。儻不知輕重緩急。仍沿故習。必治以應得之罪。不能稍為寬宥也。○又

諭大臣官員等奉使各省。馳驛往來。應給之馬匹廩給。及跟役口糧。各按品級。以為等差。於兵部勘合內逐一填註。原不准例外多支。乃派出之大臣等。多假欽差聲勢。騷擾驛站。隨行官員亦復不知斂戢。以致家奴跟役訛索多端者有之。各該省督撫並不効衆。地方官懼其陵辱。惟求安靜過站。曲加承應。違例濫支。

即多用夫馬車輛勒取供應。亦不敢復行爭較。而辦差之家人胥役等藉端派累民間。從中侵冒。其弊將無所不至。若不聲明例禁。嚴示創懲。何以肅清郵政。況地方官辦理差務。毋論大小官員。皆宜恪遵定例。即朕省方所至。守土官吏。各有除道清塵之責。朕尤曲加體恤。切戒華靡。豈遣派辦事之員。轉可任情滋擾。朕軫恤民隱。凡有赴京控告者。無不欽派大臣前往審辦。今雖馳驛人員。間有騷擾之事。亦不肯因噎廢食。不行派遣。致小民含冤莫愬也。特此降旨。剴切誠諭。嗣後欽差大臣官員。如敢於應得馬匹廩給之

外稍有擾累。一經發覺。即行從嚴治罪。若該管督撫等任聽屬員違例濫付。希圖見好。不行叅劾。亦即將該督撫一併嚴究。決不姑寬。○五十八年

諭近年外藩傾心向化。絡繹來朝。此等外藩使臣經過省分。該督撫等量加犒賞。以示款接。亦儀文所應有。但須定有限制。不可過濫。若止圖體面。踵事增華。勢必有加無已。徒耗物力。在督撫等養廉優厚。如果出自己貲。備物賞給。所費無多。原屬易辦之事。但外省習氣。遇有此等賞需。往往派令屬員承辦。而屬員等借此為名。取之地方百姓。殊多擾累。嗣後該督撫於

外藩使臣過境時。惟當照常賞給已貲自辦。不必逐漸增加。亦不得轉派屬員。儻仍沿積習。輒令州縣辦備。致有擾累百姓之事。一經查出。必將該督撫重治其罪。各宜實力懍遵。無負諄切訓誡之意。

欽定大清會典事例卷六百九十七

兵部

郵政驛集二

嘉慶五年

諭。前因督撫等於地方尋常事件。往往由驛馳遞。曾經降旨通行飭禁。近聞各省積習相沿。無論公文緊要與否。概由驛遞。即通問私書。屬員賀稟。均用印封交驛。甚至有由六百里加緊加快馳送者。以致各驛站每日急遞公文多至數百件。各州縣官設驛馬專為馳遞文報。今擅遞私書賀稟。以私事而用官驛馬。供

其馳送其流弊無窮。將見外任家眷馳驛赴京。豈不同前明之覆轍。且各驛站於此等限行之件。既視為泛常。勢必遇正項緊要文報。轉多延閣。於郵政殊有關礙。外省私書賀稟。不過通問陋習。本不應擅用印封。更何得交驛馳送。動輒填寫五六百里。全不顧疲勞驛馬。此皆由督撫司道首先作俑。臬司係專管之員。並不認真查察。屬員因而效尤。不可不嚴行禁止。嗣後督撫大吏。務當先自檢點。於驛遞事件。權其輕重。緩急。並嚴飭各衙門。除實係緊要公事。仍用五六百里遞送外。其餘尋常公文。應由馬上飛遞者。不得

濫填五六百里。至私書賀稟。均不准擅用印封驛馬。儻經此次嚴禁之後。地方官有仍蹈故轍者。著該管督撫臬司嚴叅懲辦。若該督撫臬司漫不經心。或自違例禁。別經發覺。必將該督撫臬司一併交部嚴議。

○十一年

諭 各省州縣安設驛站。以備馳遞文報。及緊要差使。凡遇欽差官員往來過境。及此外應行馳驛者。自應查照勘合內所填夫馬之數。照例給予。然亦不得稍涉浮濫。至於本省官員往來境內。其夫馬飯食俱當自行備辦。豈得責令地方官供應。乃近日督撫司道等

官經過所管州縣該地方官不但豫備夫馬且須鋪設公館供應飯食爭華鬪靡曲意逢迎甚至有餽送程儀之事惟以辦差為能而郵政轉置之不問即或該州縣額馬不敷平日有廢弛浮冒情事方且代為彌縫又安肯覈實查辦積弊相仍自當嚴行飭禁嗣後州縣驛站應付惟當以勘合為憑毋許濫應濫支如有違例供應以及藉端餽送或沿途勒索及縱容家人長隨肆行需索者一經查出或被入叅劾必當嚴懲示儆其所屬州縣額設馬匹如有短少情事該上司務當隨時整頓毋任虧缺干咎○十四年

諭

御史楊健奏請肅清郵政一摺。據稱督撫等往往藉查辦地方公務。擾累驛站。現在山西即有成甯因閱兵。濫支車馬需索門包。恐外省似此者尚多。請嗣後飭令各督撫因公出境。將隨帶人等先行知照臬司。以轉行各站按例覈給。仍令將應付數目申報臬司。以備查考。其司道以及各員一體遵照辦理。儻有違例。即交臬司糾叅等語。所奏自為肅清郵傳起見。而於外省積習所言尚未確實。各省驛站。惟奉差人員例有應付。其督撫內若非奉特旨馳驛者。原不准輕動驛站。伊等養廉優厚。足資辦公。且查辦公事。不過近

在本省。一切人夫車馬需用幾何。又何難自為雇備。無如外省陋習相沿。上司經歷所屬。不必明言馳驛。而州縣豫備車馬。惟恐其不多。供帳惟恐其不盛。甚至門包使費。需索無厭。屬員既視為固然。上官亦以為應得。以此見好逢迎。所費不取於官。必取於民。實屬近時積習。此等擾累情形。較之奉差馳驛人員。所費尤鉅。皆由州縣等畏懼本省上司聲勢。曲意花銷。並聞於別省大員過境之時。亦皆一律承應。辦差恐後。希圖他日遷調本省。可免排斥。其辦差之長隨家人等。因得藉端漁利。設法開銷。種種弊竇。由斯而起。

該御史聞見尙不及此。亟應嚴為禁制。以肅郵政。而飭官方嗣後各督撫及過境大員。一切車馬供應俱著自為雇備。不得取之州縣。其州縣等亦不得陰為應付。各省臬司係專管驛站之員。如再有不遵功令。恣意妄行。無馳驛之名。而有馳驛之累者。著交各該省臬司隨時查察。據實叅奏。如臬司扶同徇隱。知而不言。一經發覺。必將該臬司從重懲處。其司道等官。遇有公事經過州縣。亦著一體懷遵。毋得陽奉陰違。致干咎戾。○道光元年

諭

御史梁中靖奏請查禁山西驛站擾累一摺。向來回

子伯克年班來京行李跟役照例給以夫馬原不許私帶貨物皮包致滋擾累茲據該御史奏稱近來年班來京者沿途售賣貨物絡繹不絕州縣驛馬不敷票拏車馬應用甚至派撥民夫擡送歲以為常驛站不勝其擾著山西巡撫嚴行查禁其甘肅給發勘合時該管衙門務遵照定例填寫跟役包斤數目毋許私自加增如有私帶貨物概令自雇腳力不准濫給車馬派撥人夫以符定例此外各州縣門丁長隨及上司差委官員丁役有違例私借夫馬需索擾累者並著一體嚴查究治以肅郵政○四年奏定凡馳遞

本章及緊要文報。應有員弁押送者。如不親身押送。即將該員弁並該管之上司。均照例分別議處。○又奏定奉派臺站員弁遞送緊要事件。如有不親身馳遞。令人代替者。照例議處。甚至刻剝官役故意跑死驛馬。及干預地方事務。擾害百姓者。俱按例治罪。將管派不慎之上司。及徇情不叅之督撫提鎮。均照例分別議處。○十年

諭。有人奏河南省驛站額設馬匹多則十存四五少則十存二三。除草料工食仍照舊報銷。侵蝕入己外。復

依額設數目勒買民間草料。所發錢文照時價減半折扣。名曰官價。並有不給分文逼令空具領狀。抑或按地畝攤派。竟用印票徵催。且交納之時。各處需索規費。稍不如意。料則一石僅作數斗。草則數斤止。作一斤餘。賸大半均按官價加倍折納。稍稽時日。即斥為抗違。笞杖交加。其科派車馬大河南北則有飛車。牌子車。舉人車。銀兩車。紅差車。轆子車。坐馬。支號馬等名目。豫省西南附近祥符縣。凡有牛驢之家。無不編派。竟有終歲未曾當差。按日勒其納價。合計一年差費。不啻正項錢糧。各屬佐雜等因而效尤。每年各

包攬車馬若干。作為正項出息等語。各處驛站馬匹。遇有不敷。原應隨時買補足額。其雇覓民車。本有例給銀兩。豫省州縣各驛馬匹。既多缺額。派用民間車馬。並不照例發價。又復從中漁利。楊國楨身為巡撫。豈竟毫無見聞。臬司麟慶管理驛站。是其專責。著楊國楨督同麟慶。將各處驛站逐一清查。缺額者勒限買補。不得於民間派借。遇有驛遞額車實不敷用。雇覓民車。即照例給價。不許擾累閭閻。如查有缺額。不即買補。及藉差侵蝕勒折等弊。即行據實嚴叅懲辦。儻查辦不力。仍有前項弊端。或經朕訪聞。或有人叅

奏惟楊國楨麟慶是問

五見驛馬作○又

諭

楊懌曾等奏查明豫省驛站情形一摺豫省驛務派買草料向因市價時有長落例價不敷州縣廉俸有限力難津貼不無借資民力至車輛為各驛所本無不能不雇自民間以備應用各處辦理情形不一皆係照例給予雇價歷年已久上下相安據該侍郎等查明現在並無違例擾民如御史劉光三所奏濫派勒折需索包攬等弊但事屬官民交涉僅辦理不善則弊竇叢生難保胥吏等不從中漁利致擾閭閻全在該管上司隨時偵察力防流弊方能上不誤公下

不病民嗣後著該撫責成臬司嚴飭有驛州縣務宜恪守舊規實力稽察如有前項情事立即叅辦有犯必懲於循照舊章之中寓嚴絕弊端之意設奉行不加視為具文致民間稍有被累一經發覺惟該撫與臬司是問。十二年

諭

有人奏江蘇銅山縣東岸驛額設馬一百匹利國驛額設馬八十五匹桃山驛額設馬七十七匹安徽鳳陽縣王莊驛額設馬六十四匹濠梁驛紅心驛各額設馬六十五匹現在每驛所存不過十餘匹遇有差事或下站打越上站或票拏民羸民車供應存驛之馬

交家人餽養聽其剋扣草料本年七月初聞利國驛
馳遞粵東軍營文報中途雙馬俱倒驛夫步行數里
始於腰站得馬乘騎僕離腰站較遠豈不耽延時刻
恐各處皆所不免等語國家設立驛站關繫甚重各
省額設驛馬支領馬乾棚廠等銀並准每年報倒二
三四分不等自宜如數足額留心餽養似此剋扣侵
冒額數懸殊成何事體該省不肖州縣因循欺飾巧
於彌縫一聞上司稽查上下站俱可通融調集弊何
由除著陶澍林則徐鄧廷楨認真稽察設法抽查如
有前項弊端立即嚴叅懲辦毋稍姑容以清積弊而

肅郵政

互見驛馬詳

○十三年

諭

前據給事中吳敬恆奏江南銅山等縣驛務廢弛當
交陶澍等查明據實具奏茲據陶澍林則徐先後奏
到違委委員密加抽查尚無缺額及剋扣侵冒等弊
國家設立驛站馳遞緊要文報關係甚重自應按額
足數妥為餽養上下站不得通融調集致滋弊竇自
此次飭查之後著責成該督撫等隨時認真稽察設
法抽查儻各驛站有前項弊端立即嚴叅懲辦若任
管驛州縣因循欺飾別經發覺或科道指叅惟該督
撫等是問決不寬貸○又

諭

前據給事中吳敬恆奏安徽鳳陽縣驛務廢弛當交
鄧廷楨查明據實具奏茲據奏達委委員嚴密抽查
所有鳳陽縣三驛馬匹尚無缺額及通融擾累等弊
國家設立驛站馳遞緊要文報關係甚重自應如數
足額妥為餵養不准上下站通融調集致滋弊竇經
此次飭查之後仍責成該撫隨時認真訪察實力稽
查如各驛站有前項弊端立即嚴叅懲辦儻查訪不
力任聽管驛各州縣因循欺飾有意姑容將來別經
發覺或科道指叅惟該撫是問決不寬貸○十四年
諭給事中全應麟奏驛站弊端一摺國家設立驛站馳

遞緊要文報關繫甚重若如所奏驛馬半皆缺額存者亦疲瘦不堪且有強留前站之馬令其支應差使名曰打過站其馬匹並不餵養致倒斃益多例支馬乾等項上下分肥視為常例州縣於豫備車馬之時先期令胥差傳拏協濟鄉車多至數百輛令其自行餵養不准出入給予銀錢方行放走甚至差使已過而仍不放走者民間不堪其苦至於摺差包送銀兩屢次失事上差往來借用夫馬兼有餽送並幕友長隨於私書家信擅用印封馳遞公館之陳設供應之侈靡家人之多索門包廝養之私乘驛馬種種弊端

實屬郵政之害著責成各督撫等隨時認真稽察嚴行訪查一經查有前項弊端立即嚴叅懲辦若任管驛州縣因循欺飾別經發覺或科道指叅惟該督撫等是問決不寬貸○二十一年

諭

各省由驛馳奏摺件應視事之輕重分別郵程之緩急軍務固關緊要然如調兵起程日期即由馬遞奏聞亦不為緩桂良於遵旨調兵赴粵輒由五百里四百里馳奏駭人聽聞殊屬不曉事體著傳旨嚴行申飭○又

諭

給事中董宗遠奏請整飭郵政一摺各省驛馬例有

額設本足敷馳遞之需近因軍務喫緊屢經降旨嚴
加整飭若如所奏近來驛站多不足額且以疲瘦充
數往往中途倒斃並有上下站合棚餵養通挪應差
之說甚至並無馬匹止知剋扣馬乾自飽囊橐一遇
公文緊要需馬甚多或取自民間或索價自辦以致
森囊需索擾累公文互相推諉等語著各直省督撫
責成臬司嚴諭所屬力加整頓並查明驛站馬匹如
有虧缺以及前項情弊即著據實從嚴叅辦以肅郵
政○三十年

諭

御史富興阿奏陳一摺軍報發遞自應加意嚴密著

兵部查照舊例慎重加封傳知各省有驛地方謹慎接遞毋得稍有磨損以致拆動滋弊如查有何處損瀝及有拆動形迹一面加封遞往前途一面稟請該管上司查辦毋稍玩忽○咸豐五年

諭

本日貴州學政鮑源深由五百里馳奏貴州勦辦苗匪並軍營需餉情形均係巡撫蔣蔚遠節次奏聞業經降旨飭辦之事殊覺徒勞驛站各省學政職司考核地方公事本不與聞其或該省大吏廢弛不職措置乖方原准學政彈劾然非事機緊急迫亦止專差齎摺豈容輒由驛遞又如編修張金鏞由山西考官簡

放湖南學政具摺謝恩亦由三百里驛遞尤屬非是嗣後各省學政除派辦防勦事務及實有緊要事件迫不及待者准其發報外其餘概不准擅用驛遞以示限制○七年

諭

和春奏陳奏事件久未接奉諭旨請飭查明等語據稱自上年十二月起至本年三月止該大臣陳奏摺件所奉明發諭旨均未接到部文著該部迅即補鈔飛咨該大臣欽遵辦理並著查明是否發遞遲延抑係沿途遺失專摺奏辦嗣後各路軍營奏報所奉諭旨該部即迅速鈔錄由驛馳遞不准稍有積壓如再

遲誤以致各該省紛紛奏請補發者著該部堂官查明係何處遲延積壓即行叅處以肅郵政○九年

諭

王慶雲奏請嚴禁騷擾驛站一摺四川各土司進京朝貢經過驛站往往任情需索夫馬芻蕘百端挾制滋擾民間護解官兵不能認真約束並有通同分肥諸弊實屬任意妄為著直隸山西陝西各督撫轉飭有驛站地方官嗣後土司過境如有格外需索滋擾情事准其據實通稟一面移營派撥員弁押送遄行其護解官兵即行從嚴叅辦儻地方官隱匿不報別經發覺或任意刁難一併嚴叅以示懲儆○十一年

諭

前因各省接遞軍報遲誤諭令兵部將各該督撫臬司等從重嚴叅茲據兵部將遲誤時日並未填日期遺失尾單各省分查明開單覆奏湖北山東接遞晏端書德楞額李續宜等奏報有數日未填接遞日期該督撫臬司等實屬督催不加所有湖廣總督湖北山東各巡撫臬司等均著吏部查取職名先行嚴加議處其樂斌奏報經由甘肅陝西山西直隸等省傳牌尾單係在何省遺失抑係原發省分未經黏連著各該督撫臬司等查明聲覆由兵部奏請嚴加議處其餘接遞軍報遲誤時日之各省督撫臬司等均著

交吏部按照單開分別輕重議處並著各該督撫臬司於接到部文後按照單開各件勒限一箇月查明積壓遲延之地方官嚴叅懲辦其繞道處所有無遲誤一併查明據實叅辦至遺失尾單及未填寫日期尤非尋常疏忽可比著甘肅陝西山西直隸山東湖北各督撫臬司挨站根究從重懲處儻逾限延不查覆即著兵部將該督撫臬司指名嚴叅另片奏請將直隸總督臬司嚴議並嚴定填註接遞時刻等語東直門腰撥接遞文報遲誤順天府兼尹張祥河等業經降旨交部嚴加議處署直隸總督文煜按察使吳

廷棟著一併交部嚴加議處至各省文報繞道地方該州縣恃非正站難免有蒙混造報情弊並著各該督撫臬司按照兵部所奏嚴飭各屬查明何處應行改道籤明時日里數毋許稍有錯漏虛捏並將傳牌尾單妥為收執以便稽查○又

諭

翰林院侍講學士楊秉璋奏請整頓驛站一摺近來各省驛站馬匹每多缺額其倒斃者買補之價多入私囊現存之馬類皆疲瘦不堪乘騎一有差使過境或扣留過站馬匹應用或派胥役勒取民間百弊叢生不可勝數據該學士奏稱直隸之良鄉涿州柏鄉

內邱等縣河南之延津縣郵政尤為廢弛著各直省督撫嚴飭各該州縣將缺額馬匹勒限一箇月買補足額如查有挪借搪塞及逾限不交情弊即著從嚴叅辦

互見驛馬詳

○同治元年

諭

本日據韓超奏請將乙卯科鄉試歸併本科舉行並貴陽等屬請加文武學額中額等摺已分別照請並交部議奏矣該省鄉試改於五月舉行為期較迫惟究非緊急軍務可比該署撫遽由六百里馳奏殊屬不合韓超著交部議處嗣後各直省督撫及各路統兵大臣於應奏緊要軍情固不許稍涉稽緩貽誤事

機斷不准以並非緊要事件率由六百里馳奏以重郵政○又

諭

向來發回各處奏報及寄各省諭旨均由軍機處交兵部加封發遞原以事屬機要不可不倍加嚴密近聞各處驛站竟有設法私拆釘封潛行閱看者窺探祕密洩洩軍情可惡已極本日據熙麟奏稱接奉批諭拆封時雖封套包裹依然而原釘紙捻業已斷折顯有前項情弊請嚴行查辦等語著兵部逐站挨查接遞熙麟此次發回摺報係屬何站作弊擅行拆閱立即從嚴叅辦至此等弊端外省相沿恐尚不止一

處應如何嚴密防範之處並著兵部妥議章程責成各該督撫設法稽察如有拆損痕迹下站不准接收即知係何站之弊即由各該督撫查明從重懲辦以振頽風而除積弊○八年

諭

據文碩奏經過蒙古臺站訪聞近來差役繁多行人需索過重情形苦累等語自西疆不靖以來一切兵差往還經過蒙古地方不得不資其供應惟為時既久情形不無苦累自應隨時加意體恤若如文碩所奏馳驛官兵人等竟至夾帶行商包馱客貨苛求規禮多索廩羊勞擾追呼動加鞭笞種種惡習實屬不

成事體著福濟榮全文盛於所屬臺站地方務當隨時查察除照例供應外不得任意需索儻有前項情事即行從嚴懲辦並著理藩院行知各該管驛部員一體遵照辦理

互見理藩院通務驛速防

○九年

諭

曾璧光奏夾板被拆請飭稽察以杜弊端等語據稱本年正月間接到兵部同治八年十二月二十一日封發夾板一副查有黃布包印花內外封筒釘封均已拆損上有隆橋驛黏籤聲明前途拆損字樣顯係隆橋驛以前各站私行拆閱等情夾板公文最關緊要竟敢中途私拆實屬膽大已極若不嚴行根究何

以重郵政而昭慎重著四川總督迅飭臬司確切查明此項夾板究係何站拆動從嚴懲辦不得含糊了事至各省驛站亦往往有私拆公文之弊嗣後著各該督撫責成臬司妥議章程於上下站接遞詳細稽察以杜弊端如查有拆損情事即將私拆之人加等治罪並將管驛之各該地方官從嚴叅處以儆效尤

○十一年

諭額勒和布奏臺站往來各差近來每藉官差販帶貨物在臺任意需索駝馬稍不如意輒加鞭撻請旨嚴禁等語臺站為支應官差而設若如所奏藉差帶貨

濫索駝馬等情實堪痛恨亟應嚴行禁止著各城將軍大臣等嗣後凡遇各項差使即分別差務輕重人數多寡覈明應用駝馬數目給發印照將官兵員名往來處所實需駝馬數目逐一填明照內賽爾烏蘇張家口管站部員即按印照所開數目另加傳單飭臺供應其由京前赴口外各差即責成張家口管站部員按照部發勘合如數飭傳僮該官兵有格外需索各情或管站之員暨各臺徇情濫應一經查出即著從嚴叅處毋稍徇庇○光緒二年

諭張兆棟奏考官回京由水程前進等語各省考官

照例應由驛站行走近年廣東考官姜竣回京輒稱患病改由水路啟行殊屬有違定例除此次正考官王之翰副考官郁崑業經起程毋庸置議外嗣後著不准行